


## Biografía di Donald Greenville Baly

**Donald Greenville Baly** a nace na Sint Maarten dia 18 di december 1934. Tur hende conoce como Baly. Su mama yama Elsie Wilfrida Laveist y su tata yama Gyon Horry Baly. Baly a nace na Coolbay, e parti Hulandes di Sint Maarten. Baly tin 6 ruman, 3 mucha muhe y 3 mucha homber. Baly ta di e number 4 di e 6 rumannan. Dia 4 di februari 1937, cu 2 aña, Baly a bin biba na Aruba. Baly a biba semper na San Nicolas. Baly ta casa cu Maria Magdalena Christiaan, naci dia 27 di mei 1939. Nan a casa na Boneiro dia 6 di december 1959. Hunto nan a haya 3 yiu. Nan yiunan yama Maria Altagracia Baly, naci dia 26 di april 1961, Salvia Sonia Jessica Baly kende a nace dia 11 di januari 1964 y Anuesca Baly cu a nace dia 13 di juni 1967.



### Según Baly e Bida Artistico a nifica hopi pe



Segun Baly e bida artistico a nifica hopi pe y e conocimiento musical cu e a haya, ta danki na e bon guia musical di su mayornan na cas. Den Baly su famia tabatin diferente musico. Su mama tabata canta y tur 3 ruman muhe ta toca piano. Su ruman homber ta trompetista y su ruman mas chikito cu ta maestro ta clarinetista. Sugun Baly un di su ruman homber y su tata tabata mors cu fiyo. Su

mama tabata jong y su mama tabata siñ'e toca guitarra. E talento tabata den famia mes. Cu 9 aña su ruman muhe a bay siña toca piano. Ora no tabatin buki mas, su mama tabata bestel buki di musica. E tempo aya no tabatin les di musica na scol. Pero, segun Baly nan a persevera! Pa Baly tur mayor mester percursa pa nan yiu haci algo util pafó di ora di scol. Esey ta loke mester bin bek na Aruba.

### Baly como Musico

**Tur mayor mester percursa pa nan yiu haci algo util pafó di ora di scol. Esey ta loke mester bin bek na Aruba**

Baly mes a cuminsa como musico na aña 1947. Baly a cuminsa cerca señor Muller kende tabatin Excelsior Band na San Nicolas. Despues di 2 aña Baly a bay toca cu Frère Jans van Faren cu te cu 1949 tabata ensaya na San Nicolas. Despues nan a haci un cambio y nan a hiba tur cos na Playa. Na Playa nan tabatin ensayo unda ta e edificio di De Trupialen awor aki. Dia 28 di

augustus 1958 Frère Alexius a termina cu e banda. Tabatin mas o menos 7 mucha ta toca. Nan tabatin 4 sousaphone grandi (base horns grandi). Un evento basta grandi na unda e grupo a toca tabata na entiero di Juancho Yrausquin. Anto tur '4<sup>th</sup> of July' nan ta toca den Colony, na Sero Colorado. Despues Baly a toca na YMCA bou direccion di señor Arnold Blijden.

Nan a cuminsa cu YMCA y a toca mas o menos 7 aña pa e organisacion aki. Franklin Granadillo y Donny Pieters tambe a toca cu Baly tempo Arnold tabata dirigente. Tabatin mas musico, manera Stanley Hodgh, Benny Vrolijk cu 3 of ta 4 ruman di Benny tambe cu ta toca den e banda. Nan tabata mas o menos 30 hende ta toca den e banda di YMCA.

## Banda Musical di YMCA

Tambe nan a forma un grupo di e banda ey pa bay den Carnaval. E tabata mas bien un brass-band. Remarcabel ta e echo cu tur tocado por a lesa musica. E banda di YMCA tabatin varios instrumento di biento (blaasinstrument) y no hopi 'snare drum.' Nan tabatin saxofon, clarinet, bariton y trombon. Te hasta nan a toca calypso. Baly ta corda e dia aki hopi bon, nan a toca e piesa 'Archi'.

Segun Baly despues di tempo Hodgh a drenta den e banda y otronan tambe manera Budy den feliz memoria, kende tabata toca trombon. Otro nobernan cu Baly ta corda ta Dolfín y Brothers Pantoflet. Segun Baly nan no ta muchanan cu ta coy un instrumento y bay supla djis pa supla. Nan tabata musico di berdad. Nan a toca den parada di Carnaval, for di e veld pariba di santana na San

Nicolas ey, nan a bay ful rond y termina na Lago Sportpark. E diamars cu tin e kimamento di momo, tambe nan tabata toca. Pa tur e 3 dianan ey nan tabata recibí un pago di 15 florin. Segun Baly nan tabata haya menos placa cu loke e trahe mes cu nan a cumpra pa bisti a costa. Asina ta, cu Baly no a sigui toca pa e ocasion aki mas.

**Remarcabel ta e echo cu tur tocado por a lesa musica**



**Baly cu su Sousaphone**

## YMCA Brassband

**Baly su motivacion pa sigui desaroya e instrumento ta cu Baly semper a y ta gusta musica**

Baly ta conta cu ora Blijden kier a lanta YMCA brassband, nan no kier a duna e instrumentonan di Colony. Nan kier a duna un organizacion, por ehempel YMCA. Asina nan bin ta toca bou di YMCA como YMCA brassband. Baly a dedica mas tempo na e bass. Principalmente pa un wals, e bass ta duna e prome noot.

Despues cu Baly a bay cu frère, no tabatin alt. Nan a uza un biugal. Esey Frère ta uza pa acompañamento. Tabata Ivan Schumelog, Baly su ruman homber chikito, Eddy Howardton y Baly. Nan cuatro ta toca e parti ey. Anto durante cu Baly tabata toca cu Frère, e a dicidi pa cambia e biugal pa bass-trombon.

Ora nan no tabatin otro hende cu ta toca bass, anto Baly ta toca esaki. Despues di tempo Frère Alexius mester a bay for di Aruba. Segun Baly tabata Frère Andreas y Frère Pedro kendenan a tuma e timon over. Frère Pedro a logra bin cu instrumentonan nobo pa e banda completo.

## Diferente Instrumento y Estilo Preferi

Baly a cuminsa cu e alto, despues e biugal, valvetrombon y despues e bass. Fuera di bass-trombon Baly ta toca stellar sax. Esey Frère a bestel apart pa Baly. Pero durante e periodo ey, Baly a cumpra un stellar sax, anto e tabata toca den misa. Ningun hende a siña Baly toca e instrumento; Baly a cumpra un buki y a siña su mes. Baly ta haya e instrumento aki mas facil pa toca. E reed (caña) ta mas facil cu un blaasinstrument y door di ehercicio bo ta logra domin'e. E ta bay mas facil cu supla, pasobra hopi mucha no ta gusta supla como cu nan no tin pasenshi.

Baly su motivacion pa sigui desaroya e instrumento ta cu Baly semper a y ta gusta musica. Nunca Baly a preocupa pa bay toca por ehempel den un conhuntito. Segun Baly bo mester dedica hopi tempo na e tecnica y un bon halamento di rosea. Baly ta conta cu su persona nunca tabatin problema pa hala rosea y semper por a sigui toca tranquil. Cada hende tin nan sistema. E estilo cu Baly a y ta dedica mas tempo na dje, ta musica clasico.

Baly ta remarca cu un director di orkesta semper ta dirigi nan. Tambe nan ta uza un metronomo y asina nan ta percura pa bo tin e bon compas. Nan ta haya e buki pa hiba cas pa ensaya. Baly ta conta con den tempo di dirigente Muller, tabata pio ainda, pasobra tin biaha nan tin un parada anochi y no tin cuenta di pone luz. Anto nan tin cu siña e piesa fo'i cabes. Durante ensayo, e ta paga e luz. Y bo tin di sigui toca, sino e ta bisa bo, cu bo no a ensaya na cas. Baly ta corda con nan a cuminsa toca na Watapana Festival. Esaki tabata e tempo aya, den e standplaats di Hotel Central na Playa. Den tempo di Frère Alexius, tur Aña di La Reina nan a toca na standplaats pega cu Setar den Hendrikstraat.



## Sugerencia

**Introduci  
lesnan di  
musica bek  
na scolnan**

Baly su sugerencia relaciona cu nos futuro generacion ta cu nan mester introduci lesnan di musica bek na scolnan pa nan. Bo ta haya awor aki un falta di comunicacion tambe. E mayor no ta busca pa hincá su yiu den un sport. E no ta hunga bala cu su yiu. Nos tabata traha y hunga cu trom tempo nos ta chikito. Nos tabata traha un fli. Awor nan ta djis cumpra un fli. E parti creativo pa haci of construi algo abo mes, lastimamente no t'ey mas.



**Tempo di Frerenan**

